



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 7

US aser S Korea-i yimjung tsütsü timtem agütsür: Kim Jong Un

Sorkari J&K nunger ajak nem security agütsütsüla: Omar Abdullah

VOL. XIX NO. 7 (ADOK 7) DIMAPUR YANGTEPNÜ (THURSDAY) MONGPUTENI (OCTOBER) 14, 2021 ₹ 5.00

58th AC nungi S. Keoshu Yimchunger-i takok nguogo



October 13, 2021 nü MLA S. Keoshu Yimchunger-i General Observer Nagarajan M. IAS lia Returning Officer B. Henok Buchem ket nungi Certificate of Election agizükba angur.

Dimapur, October 13, 2021

(TYO): 58-Shamator-Chessore (ST) AC indang by-election nung Nationalist Democratic Progressive Party (NDPP) candidate S. Keoshu Yimchunger den tokteper shinga melii pai takok nguogo.

Tuensang district kübok Sangphur nunger S. Keoshu Yimchunger-i takok nguogo ta Chief Electoral Officer, Nagaland, V. Shashank Shekhar, IAS-i Bodbarñü sangdong ka nung ashi.

58-Shamator-Chessore (ST) AC by-election atema tenüng meyipa agitsüba October 13, 2021 liasü aser iba mapang süiba sülen Returning Officer aser

Additional Deputy Commissioner, Shamator B. Henok Buchem-i NDPP candidate S. Keoshu-i takok anguba kuli agütsü.

By-election nung tokteptsü atema October 8, 2021 nü tenüng agütsüba mapang tembang aser iba anogo tashi nung nisung kati dang tenüng agütsü, ta Returning Officer-i ashi.

58-Shamator-Chessore (ST) AC nung taoba MLA Toshi Wungtung ajungbena asüba ajanga iba menden tazüing aküm.

Election Commission-i October 30, 2021 nü 58-Shamator-Chessore (ST) AC nung by-election agitsüba osang metetdakja liasü.

Mkg DC-i gari lenmang yangluba atema metetdaksür

Dimapur, October 13, 2021

(TYO): NH 702 D (Mokokchung-Mariani Road) yanglushiba ajanga gari senzüsenbongba nung timtem ajurutsü, ta Mokokchung DC Limawabang Jamir-i metetdaksüogo.

Mokokchung Mariani Road mapang yanglushiba mapang senzüsenbonger ajaki timtem arema senzütsü mepishir ta Limawabang Jamir-isa ashi. October 18, 2021 nungi

National Highway-2 kübok 147.000 Km to 156.000 Km (Sewak Gate-DEF) tashi lenmang yanglutsü. Anungji ali kiburtem, sorkar agency/ teloktemi iba lenmang anasa yua aliba osettem, süng, garitem agientsü metetdaksür, ta Mokokchung DC-isa tanga sangdong ka nung ashi.

Iba tetuyuba sülen manidakra ketdangsürtemi osettem sota ayutsü aser kiburtem anema ken o benoktsü, ta paisa metetdaksü.

Nagaland Governor-i benjung salem abener

Dimapur, October 13, 2021

(TYO): Nagaland Governor Prof Jagdish Mukhi-i Dussehra aser Durga Puja salem lemsatepogo.

Lord Rama-i Ravana madak aser Goddess Durga-ia Mahishasura madak takok anguba tenüng nung iba benjung amonger, ta Governor Mukhi-i sangdong ka nung ashi. Iba tobur tajung benjung ya tiyazü madak ochii takok anguba,

temeshipurtemi takok anguba aser temenen madak takok anguba indang lir, ta paisa ashi.

"Asenoki ajaki COVID-19 inyakyim beshia iba benjung mongdi. Iba benjung ajanga asenoki ochiba lenmang sülen anidaksü aser asenok longjemtsü, pelatsü aser azükarutsü len anidaksüdi" ta Governor Prof Jagdish Mukhi-isa ayongzük.

November ita nungi tanur nem Covid vaccine agütsütsü akok

New Delhi, October 13, 2021

(Agencies): November hopta tanabuba nungi India nung tanurtem nem Covid-19 vaccine agütsüba inyakyim tenzüktsü.

Mongulbarnü Subject expert committee (SEC)-i arishi küm 2 nungi 18 tsüingda alir nem Bharat Biotech indang Covaxin agütsütsü molunga agizük.

Tanur nem Covid-19 vaccine agütsüadang tamasa

temang nung timtem aser tashidak tulu alir nem agütsütsü.

Drugs Controller General of India (DCGI)-i tanur nem vaccine agütsütsü indang maparen meyipa reprangshir aser parnoki agizükba sülen National Technical Advisory Group on Immunisation (NTAGI)-i company nungi anguba osang reprangshimtsü.

NTAGI-i osang jungjunga bushitepba sülen tanur nem

vaccine agütsütsüba inyakyim latettsü.

"Tain aser tanurtem asoshi Covaxin shitak lemsaba sülen taküm November tiyongtsü meta ka nungi tanur nem vaccine agütsü tenzüktsü" ta NTAGI züingsem kati ashi.

Covaxin indang dose anaji tanur nem anogo 28 tepila yur agütsütsü. Tain nem agütsüba ama tanur nem-a 0.5ml agütsütsü.

COVID-19 Nagaland: 23 taneptsü angu & 15 dak putet

Kohima, October 13, 2021

(TYO): Nagaland nung Bodbarñü nisung 15 dak COVID-19 putet aser 23 taneptsü angu.

"Tesüiba ghonda 24 tsüingda nisung 15 dak COVID-19 aliba putet. Parnokji Dimapur nung 9 aser Kohima nung 6 lir," ta Integrated Disease Surveillance Project atema State Nodal Officer, Dr Nyanthung Kikon-isa ashi.

"Kasa mapang COVID-19 puteta alir nisung 23 taneptsü angu. Parnokji Dimapur nung

17, Mokokchung nung 4 aser Kohima o Longleng nung kaka (1) lir" ta paisa ashi.

Nisung 31,507 rongnungi 29,580 taneptsü nguogo aser ibaji 93.88% lir, ta paisa shisem.

Tang nisung 238 anepaludar saka parnok 165 dakbo shirangba yimya kecha mali, ta Dr Kikon-isa metetdaksü.

"Mongulbarnü nisung 699,108 nem COVID-19 vaccine indang dose 11,23,832 agütsüogo" ta State Immunization Officer, Dr Ritu

Thurr-isa ashi.

"Vaccine agirtemji frontline workers 60,945, healthcare workers 15,997, arishi küm 45 ser temapur 200,204 aser arishi küm 18 nungi 44 tsüingda alir 421,962 lir" ta paisa ashi.

"Vaccine agirtem rongnungi nisung 424,724-i dose anaprong agiogo. Parnokji frontline workers 47,680, healthcare workers 13,322, arishi küm 45 ser temapur 148,353 aser arishi küm 18 nungi 44 tsüingda alir 215,369 lir" ta Dr Thurr-isa ashi.

Jt. Secy. Power-i ajungbena mita ao

Dimapur, October 13, 2021

(TYO): Dimapur district nung power auyaa atsükba, electricity bill bendenba aser Power system tiptema ayutsü atema telok ka tentetba nung tanishir Joint Secretary, Power, Sara S. Jamir-i tanü EE Electrical office Chumukedima ajungbena mita ao.

October 13, 2021 nü Sara S. Jamir-i EE Electrical office Chumukedima nung ketdangsürtem aser staff den ajurutepa sensaksem aser laisa meter readers indang attendance

reprangdanga liasü.

"Power sector nung senotsü shitak manguba onüktem rongnung consumers nem bill tai agütsüba ka lir. Anungji meter reader temi consumer ajak asemtsüla, ita shia meter box nung energy agiba reprangtsüla aser iba nung ajemdaker bill shitak yanglur agütsütsü" ta Sara-i meter readers den sensaksem dang ashi.

"Energy sector nung sen tangutsü mengui akoksaba atema sorkari süoki ia bilemer. Bill tai

agütsüba ajanga iba ya ajurur aser iba tebilemtsüji meter readers-i abentsü. Mapa shitak meinyakba staff tem merenshitsü" ta laisa metetdaksü.

Joint Secretary, Power-isa EE Power Chumukedima aser ketdangsürtem den sensaksem dang power supply tajungba agütsütsü, line raksabatem mapang shitak nung yanglutsü aser power auya atsükba azüoktsü aser bill magütsürtem disconnect asütsü atema nenshia metetdaksü.

2025 tashi nung NE state yimtiba ajak sendakteptsü

New Delhi, October 13, 2021

(Agencies): Bodbarñü Prime Minister Narendra Modi-i PM Gati Shakti - National Master Plan tenzüktsüogo.

Iba ya multi-modal connectivity atema Rs 100 lakh crore national master plan lir.

National Infrastructure Master Plan kübok 2024-25 tashi nung national highway

network nung kilometer lakh 2 yanglutsü aser North Eastern Region nung state yimtiba ajak sendakteptsü.

"Aatmanirbhar Bharat tangatetba nung taruba küm 15 atema India indang tamendakdak tanü azünga ayur" ta Prime Minister Modi-i ashi.

Gati Shakti indang sampaing nung India nunger, Indian

industry, Indian business, Indian manufacturers aser India aluyimertem ajak dena lir, ta paisa ashi.

"Putu 21 India nung akhi inyakyim aser maparen toktsür. Tanü asenoki tekaratiba nung terenlok, teyongyaba aser külemi longjemer inyaksü nungdaker" ta Modi-i metetdaksü.

Bengal, Punjab aser Assam nung BSF telongtet ulushir

New Delhi, October 13, 2021

(Agencies): Ministry of Home Affairs (MHA)-i Punjab, West Bengal aser Assam nung Border Security Force (BSF) indang telongtet international border nungi kilometre 50 ulutsüogo.

Taoba mapang state asem nung BSF indang telongtetji kilometre 15 dang liasü.

Külen, MHA-isa Gujarat nung BSF indang telongtet ajemtsüogo. Taoba mapang BSF-i kilometre 80 telongtet nung tashi amshia aru saka tang kilometre 50 dang kümtsüogo.

Assam aser Gujarat nung BJP sorkartem lir aser Punjab o West Bengal nung Opposition party temi sorkar yimsü asür.

"BSF indang telongtetji Manipur, Mizoram, Tripura, Nagaland aser Meghalaya den Jammu & Kashmir aser Ladakh Union Territory tem ajungalen aser Gujarat, Rajasthan, Punjab, West Bengal o Assam nung international border nungi kilometre 50 nung lir" ta MHA-i metetdaksüogo.

PUJA SODI AGIR

Tir Yimiyim nung inyakertem rongnung tsümartem dena lir asünung, October 14, 2021 nü Durga Puja sodi agir anungji October 15, 2021 nü Tir Yimiyim osangkaket madoktsü.

-Yimozülur

AKM free Coaching Class maparen tenzükogo



AKM free coaching class tenzükba sentong agir külen EAC Zerutso den AKM ketdangpurtem aser coaching agitsüpurtem külemi tangokba noksa nung angur. Mokokchung, 13th October, 2021

Mokokchung, 13 Oct (TYO): Ao Kaketshir Mungdang (AKM)-i Class 10 nung tamakok ngur alirtem atema kümshi achayanga agiba "free coaching class" tenzükba sentong tanü 13th Oct nü yangi AKM conference hall nung agiogo.

Iba sentong nung EAC Zerutso-i jembidang, shir lenisüba mapang nung iba mapa tajung ya tenzükogo, parnok nem tenüngsang agütsür, adangji ibai jangratemtsü tamaren mapa ka lir, ta ashi.

Iba free coaching class tenzükba külen nungi tesayur shirnokisa yaritepa arudar aser yaritepsüba lir, parnok ajak nem akhüm agütsür, ta pai ashi. Chirnurtem takok angutsü aser tajung akümtüsü asoshi tesayurtem dang masü saka tsüraburtema sakuku teinyaktsü

shilem lir, ta paisa shisem. Tanü alima nung takok angur nisungtem ya reprangdangra parnok aika taküm nung teti dangbo takok ngua atuba masü, saka taküm nungji khenkhen/aiben tamakok angurtema lir, anungji, taruba kumbo yangi coaching agirtemi takok angutsüsa tajungtiba agi angazüktsü aser lesson meranga azüngtsü asoshi paisa tayongzükba agütsü.

Iba ya angati coaching class ka dang ta sür shingaiia pongbapongba magitsüla, AKM-i free coaching class tenzükba nükjidong angateta ajaki ret-reta agitsü asoshi paisa shisem.

Taküm iba coaching nung Maths, Science, Social Science aser English subject-tem nung takutet tesayurtemi tesayuba balala agütsütsü aser taküm

küm kaketshir 30-i iba maongka ya agir. Coaching agitsüpurtem atema Mokokchung town Baptist Arogo (MTBA) Youth Mentor, Pangerjungshilai temoatsü meshia sarasademtsü.

Tanü iba free coaching tenzükba sentong nung AKM ketdangsurtem den coaching agitsüpur aser parnok tsürabur/guardian-tem arua aden. Sentong nung AKM tatong tir - Yimjungsunep, repsem zülur - Nangjenkala Tzudir, AKM shisaliok zülur - Chubameren Imchen parnoki shilem agia liasü. Iba coaching class ya sorkari latettsüba SOP shitik amshia agitsü, ta AKM ketdangsurtemi metetdaksü. AKM-i free coaching class ya tamakok ngur alir lanurtem ajungshitsü asoshi 1997 küm nungi tenzükba tanü tashi metitemi arur.

APC Kikheto Sema-i Water Resources Secretary ajuru

Dimapur, Mongputeni/Oct. 13 (TYO): Agriculture Production Commissioner, Nagaland, Y. Kikheto Sema, IAS ajanga October 13, 2021 nü New Delhi nung Union Secretary, Water Resources, River Development & Ganga Rejuvenation, Pankaj Kumar, IAS ajurua liasü, shiba taoba mapang Nagaland Chief Secretary liasü.

Iba mapang Sema-i state nung tzü agi anünga indang lemsatep, koba küm tepiyong tzüngsa-rusa mesük tensa ajanga tali timtemdaksür. Meyi mapang danga North East states tem den külemi Nagaland nung tzünglu janga sashia aruaka 'lean season' nungbo ajemtsü atema tzü agi anünga akumer, ta pai ashi.

Tzü peria melira chiyongtsüa peria mezüsentettsü aser

aluyimeria tsünüsempongtsü shidak meyoktettsü, ta pai ashi.

Nagaland nung jenjang balala nung tenzükdanga alir aser region nung tensa angatetba nübu ka Union Secretary, Water Resources, River Development & Ganga Rejuvenation inyakba ya temoatsü lir, ta Sema-i pelaba lemsatepa liasü.

Sema-i Union secretary dang tenem aliba state tem atema tzü wazüka ayutsü aser ketdangtsütsü asoshi sentong aser scheme temyanglutsü ajungshia liasü.

APC ajanga catchment area treatment ya kanga tongtipang lir ta ashi aser springshed development nung pai ajangshiba indang lemsatepa liasü, koba state nung Land Resources Department ajanga kanga takok ngua mapa kuma inyakba arur, aser Union

Secretary dang iba mesükba sentongtem yanglu nung ajungtsü, ta ashi.

Lisem aser longsang agienba ajanga region nung ayong aser tsüpokdak tesemtem timba raksaago aser ibaji ajanga aluyimba tsütsüa kongshir, anungji tzüpokdak aser ayong kumzükba ayutsü sentongtem yanglua amshitsüla, ta Sema-i ashi.

Union Secretary ajanga item onüktem pelashishia agizük aser tarutsü nung Union government-i mungdang-mungji ayongzükba aser shisa agiteptsü sentong lir, ta ashi.

Kumar-ia spring shed aser rejuvenation of springs, ayong aser tzü aliba tesem wazüka anepalutsü tongtipang lir, ta ashi aser Ministry of Agriculture and Farmers Welfare nung benoka inyaktsü langzua liasü.

Governor Prof Jagdish Mukhi-i asükhu lemsatep

Dimapur, Mongputeni/Oct. 13 (TYO): Nagaland Bamboo Development Agency nung Chairman aser taoba mapang BJP Nagaland state tir inyakba alisang Visasolie Lhoungu mapang tatsüka shiranga arur Kohima nung October 12, 2021 nü asüba atema jashia bilemer, ta Assam aser Nagaland Governor, Prof Jagdish Mukhi-i sangdong ka nung ashi.

Asür Visasolie Lhoungu ya bendanga agütsür nendaka aser meranga inyakba nisung ka liasü, shibai Nagaland renloksü atema

temolung ajak agi inyakba liasü. Pai nüburtem ajangzüktsü atema süiki ia bile maser talisa tepetzük jenjang nung alirtem asoshi tali bilema inyak, ta Governor-i ashi.

Nagaland nung aliba nüburtem tenüng nung aser kü tenüng nung ni asükhu lemsateper. Kinunger temi iba tako marok agizükettsüsa Tsüngremi nungdakba tashi agüjang ta sarasademtsür. Asür tanüla teti tatem maka tesunep nung anisüngzükjangma, ta Governor Prof Jagdish Mukhi-isa ashi.

Chophy-i Principal Accountant General (Audit) mapa abener

Dimapur, Mongputeni/Oct. 13 (TYO): Comptroller & Auditor General indang Office ajanga totuyuba agütsüba ama, A. Pitoho Chophy, IAAS, Principal Accountant General (A&E), Nagaland ajanga October 11, 2021 nü nungi tenzükba Office of the Principal Accountant General (Audit), Nagaland indang additional charge abener, ta Sr.

Deputy Accountant General (Audit) sangdong ka ajanga ashi.

E. Mhonbemo Patton, IAAS ya deputation yimya nung Principal Secretary to the Government of Nagaland mapa inyakdaksütsü atema Principal Accountant General (Audit), Nagaland mapa nungi anisüngzüktsür, ta sangdong ajanga ashi.



Mokokchung Excise puri October 13, 2021 nü yi raksa indokba sentong ka Municipal Dumping Site nung agia liasü. Iba mapang parnoki IMFL bottle 538 aser beer bottle/cane 48 raksa indoka liasü. Iba maparen ya Commissioner of Excise, Nagaland totuyuba nung Mokokchung District Administration aser DEF-Mokokchung nungi teshimtet nübutem lia inyakba liasü.

NBSE ajanga Heads of Institutions dang metetdaksür

Dimapur, Mongputeni/Oct. 13 (TYO): Classes VIII & IX Final Examination 2021 (Phase I & II prong) agitsü aliba dak sendakba nung, pei school ji pei kaketshir atema Examination Centre asütsü, ta Nagaland Board of School Education (NBSE) ajanga NBSE kübok

register süa aliba Heads of Institutions ajanga dang sangdong ka metetdaksüogo.

Iba nungya Government aser Private Middle School tem densema lir. Tashidak wara mechi iba mera ya agitsüsa akum, ta sangdong ajangasa ashi.

NBSE-i Online Orientation sentong ayongzüktsü

Dimapur, Mongputeni/Oct. 13 (TYO): High School Leaving Certificate (HSLC) aser Higher Secondary School Leaving Certificate (HSSLC) Examinations 2022 atema Online Application Form fill up asütsü atema kaket reju nung angazükdaksütsü atema Board-i October 18, 2021 nikongdang 1:00 ako nungi tenzükba online orientation sentong ka ayongzükba lir, ta Nagaland Board of School Education (NBSE) ajanga

NBSE kübok register süa aliba kaket reju ajanga nem metetdaksüogo.

NBSE kübok register süa aliba Head of Institutions (Govt. aser Private na prong) ajak iba Orientation sentong nung adentsüla.

Office dak sendakba mapa tem online ajanga NBSE portal nung School ID amshitsü meteta alir tesayur mesüra office assistant ka-ka iba sentong nung tendaksütsü asoshi Heads of Registered Institutions nem metetdaksü.

Iba indang meeting ID aser Passcode yamai alitsü:

Zoom Meeting:

<https://us06web.zoom.us/j/89878030685?pwd=dEo5OW5JakxEVXBYd2FRdjlN0aG1zd09>
Meeting ID : 898 7803 0685
Passcode : 275347



Frontline Ministry ajanga Changki Yimlang Baptist Arogo nung Mother Heart Skool, October 7 nungi 10, 2021 tashi agia liasü. Iba sentong nung shisalen sayur Rev. Dr. Toshi Langu, Dr. Bendangyapangla Changkiri aser Mrs. Limala Sunep liasü. Iba ama tetsütem asoshi sentong tajung katsüba atema arogoi Frontline ministry dang pelaba metetdaksüogo.

Mizoram EC-i voters' I-cards belentsü atema MoU nung sign asü



Aizawl, October 13, 2021 (Agencies): Mizoram nung elector photo identity cards (EPICs) aser tanga osangtem speed post services ajanga belentsü atema Mizoram Chief Electoral Officer aser Department of Posts (DoP), Mizoram tsungda Memorandum of Understanding (MoU) ka nung sign süogo.

DoP-i Election Commission of India (ECI) den asungdangteoer Standard Operating Procedures (SoP) latet aser ibaji Post Master General (PMG) aser Chief Electoral Officer nati inyaktüsü. PMG ajanga EPICs aser notices alibatem speed post services ajanga yoktsü ta MoU nung shia lir. Speed post ajanga EPICs aser notices yoktsü atema barcode balaka agütsüsü aser shidi shia Rs.25 agitsü. Iba MoU ya October 12, 2021 nungi tenzüker kum pungu atema lir aser atsülangtsü akok. Mizoram state CEO P Jawahar aser Post Master General, Mizoram tenung nung Superintendent of Post KT Sailo-i MoU nung sign asü.

Assam DIG Hazarika mozü kidang nungi yokogo

Guwahati, October 13, 2021 (Agencies): Ochimashi mapa inyakba atema tai tonglokja apuba Assam Police deputy inspector general (DIG), Raunak Ali Hazarika mozü kidang nungi anizükogo. Pa temang nung timtem kecha mali ta kuli agütsür Gauhati Medical College and Hospital (GMCH) nungi yok. GMCH nungi pa police-i anir ao. DIG Raunak Ali Hazarika temang anema dang lir ta GMCH ketdangsürtemi ashi. DIG Hazarika-i pa temolungjang nung timtem kar lir ta ashiba agi October 7 nü pa GMCH nung anepalutsü atema anik ta police-i ashi. DIG Hazarika-i pa dang malangba rongsen jenti bendenba atema Chief Minister's Special Vigilance Cell-i October 5 nü pa apu. Hazarika ya DIG (border) inyaka liasü saka taküm July ita nung pa mapa nungi anentsü. 2011 nungi tenzüker pai temelaba kecha memeshii aiben bendangleni aoba atema tai tonglokja pa mapa nungi anentsü. Hazarika-i temelaba kecha melii Hong Kong, Indonesia, Dubai, Bangladesh, Malaysia, Bangkok aser Thailand dena linük 9-i ao. CM's Vigilance Cell-i Hazarika'er kidang nungi Bangladesh, Hong Kong, China, Malaysia, Japan aser Indonesia indang sentem ngutetogo. Iba dak alia pa ket nungi insurance policy aika ngutetogo. "Guwahati aser Shimla nung Raunak Ali Hazarika indang kiojen asem lir" ta SP Rosie Kalita-i ashi. Guwahati kübok Dhirenpara, Downtown area aser Hengarabari nung Guwahati indang ki tululu asem aser ali acre ishika lir, ta SP Rosie-isa metetdaksü. Shimla nunga pai Kothi ta ser restaurant ka lapoka lir.



October 12, 21 nü Tinsukia district kübok Tinkopani Reserve Forest anasa Spear Corps aser Police-i NSCN (IM) zungsem ka apu. Osang tejangja ka angazükba sülen sepaitemi iba tesem mita aodang NSCN (IM) apu aser pa ket nung 7.65mm pistol ka den round 3, safety fuse ka, detonator ka aser tapoktsü 250 gm bena lia ngutet.

**GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA**

NO.HED/SCHO-1/2016/ Dated, Kma, the 13th, Oct. 2021

PRESS RELEASE

It is hereby informed to the beneficiaries of the Post Matric ST Scholarship Scheme who have not received their scholarship due to dormant/invalid/inactive bank account to produce their active bank account details and claim the scholarship within 90 days from the date of publication. Beneficiaries failing to claim within the stipulated time will lead to forfeiture of the scholarship and no further claim will be entertained. This is with the administrative approval of the Government.

Beneficiaries can send the photocopy of their active bank account details along with their Application ID by WhatsApp to 9863379247 or email to query.hescholarship@gmail.com.

Sd/-
**Dr. APENI LOTHIA
DIRECTOR
HIGHER EDUCATION
NAGALAND: KOHIMA.**

Issued by DIPR.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajsüaka, tang **Kabiraj H. Umar Chesam** contact no. 8416087414 / 6909717178 National awarded **H. Umar Chesam** Address: **Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - **Ketholose Anthony, Add: Kohima**



Meghalaya-i Punjabi Lane nungi nisungtem anientsü

Shillong, October 13, 2021 (Agencies): Meghalaya sorkari Harijan Colony (Punjabi Lane) nung aliba Dalit Sikh nung tangaleni yoktsü lemteba atema National Commission for Minorities-i ken o benokba sülen Chief Minister Conrad Sangma-i okadak tokteptsü metetdaksüogo. Commission balala okadak ken o tem benokra state sorkari jembitsü ta Conrad-i ashi. "Onoki okadak jembitsü. High Court mesüra Supreme Court nunga onoki jembitsü renema lir" ta Meghalaya Chief Minister Conrad K. Sangma-i ashi. Meghalaya sorkari Harijan Colony nung alirtem lewduh-i belentsüba atema National Commission for Minorities-i osang meshiogo. October 8, 2021 nü NCM-i state sorkar dang April 9 nü Meghalaya High Court-i tuyuba ama mapa meinyaka atatsü tetuyuba agitsü. "Punjab Deputy Chief Minister Sukhjinder Singh Randhawa-i iba onük Ministry of Home Affairs dangi anentsü ta shiogo. Ajsüaka, kum asem ser tesadang ka shi shisadanga aruba sülen parnok aneintsü lemte" ta Conrad-i ashi. "Onoki tang nungi kechi inyakdir ibaji ozüngi melaba ama lir aser kulikaket tejangja yur inyaktüsü. Onoki Punjab sorkar nung lennirtem den-a jembitsü" ta paisa metetdaksü. 300-meter lane kati bendanga aliba ali acre 2.5 ya sorkar ket nung lir aser iba atema Myllem nung Syiem den lease nung sign sütepa lir, ta Conrad-isa shisem. "Harijan Colony nung alir Shillong Municipal Board aser tanga sorkar department tem nung inyaktertem dang sorkari parnok nem agütsüba ki nung oa alitsü shiogo. Nisungtem yimdong nung liang ta ashirba masü" ta paisa metetdaksü. High-Level Committee kati iba mapa atema shisadanga sentong renemba nung ajemdaker sorkari iba telemteba agi. Harijan Panchayat Committee (HPC)-ibo HLC ajanga ashiba magizüker. Parnoki ashiba agi, Harijan Colony ali ya kum 200 tejangdang Myllem nung Syiem-i tenla agütsüba liasü aser iba ali ya Sikh nung kibong 250 meyong lir.

'Dhing Express' Hima Das dak COVID-19 putet

Guwahati, October 13, 2021 (Agencies): Assam nungi 'Dhing Express' ta ajala Hima Das dak COVID-19 putet. Bodbarnü Patiala nung aliba National Institute of Sports nung Hima Das dak COVID-19 puteta liasü. Hima Das temang junga dang lir aser la dang isolation nung lir. "Kü dak Covid-19 aliba putetogo. Ni junga dang lir saka isolation nung amonger. Ni taneptsü angutsü ngur tashi itta akümtsü imlar. Nisung ajak dang kümdanga alitsü aser mask enoktsü nenshir" ta Hima-i Twitter nung metetdaksü. Hima Das-i women's 400m, women's 4x100m relay aser 4x400m mixed relay races nung national record nguteta lir.

Tripura Congress-i lennir 4 anentsür

Agartala, October 13, 2021 (Agencies): Tripura Congress-i lennir tejen pezü tashi party anema inyakba atema anentsüogo. Tanü Tripura Congress general secretary Partha Ranjan Sarkar-i iba osang metetdaksü. Tripura Congress nungi anentsürtemji: Pijush Kanti Biswas, Tapas Dey, Tejen Das aser Punita Chakma nung lir. Parnoki taoba mapang Congress party indang primary membership nungi anenba osang metetdaksü. Par pezü ya Congress party nungi kum 6 atema jendoker. Külen, taoba Tripura Congress president Pijush Kanti Biswas-i political party tasen ka tentetogo. Iba party dang Tripura Democratic Front (TDF) ta ajar. "Ni Congress nung dang liabo nübortem asoshi meinyaktetsü ta angatetogo" ta Pijush Kanti Biswas-i ashi. Külen, Tapas Dey-i kum 60 tashi Congress nung zungsema aruba sülen party toktsüogo.

Manipur nung tanur ka dena nisung 4 khaset

Imphal, October 13, 2021 (Agencies): Manipur kübok Kangpokpi district nung asüpila sentong ka agidang telungpurtemi injang khaloktsüdang nisung pezü khaset. Kangpokpi district kübok Gannom yim nung iba lendong atalok aser tasürtem rongnung tanür ka dena liasü. Iba lendong nungsa nisung ana yirua lir. Kuki National Liberation Army (KNLA) zungsem pezü den asüpila sentong ka agidang iba ya atalok. Iba osang angashia police ketdangsürtem Gannom yim tonga ogo. "Ozü sorkari iba ama mapa inyakba magizüker. Democracy nung ozüng alema inyaksangshi mesüdaksütsü. Telungpurtemi inyakba mapa ni khukhua aitsür" ta Manipur chief minister Biren Singh- metetdaksüogo.



TIR YIMYIM YIMOBILEM (EDITORIAL)

DIMAPUR YANGTEPNÜ, MONGPUTENI(OCTOBER) 14, 2021

Terlepzüc mong, Dussehra

Tang ya alima nung Hindu nungertem alidak, talisa India aser Nepal lima nung Hindu nung Dussehra benjong amongba mapang lir. Asenokibo iba benjong ya Durga Puja ta dang metet. Ajisüaka, Durga Puja yabo anogo ter nü tashi agia Dussehra benjongmong amongba nung shilem ka dang lir. Iba benjong mapang parnok parnok tsüngrem tetsür Durga külemba agi Durga Puja, Durga külembamong ta ajar. Ashi, shitakbajibo Dussehra benjong lir. Iba ojang ya Sanskrit oshi nung 'Dasha' tetezü ter (10) aser 'Hara' tetezü akokba (defeat), anungji ter akokba mesüra asenok sobaliba oshi nungbo Terlepzüc asütsü. Iba benjongmong tenung ya Hindu nung akhi otsü Ramayana dak sendaka lir. Iba otsü ya Ayodha chuba Rama kinungtsü Sita, Ravanai pua bener aoba nungi Ramai tanaben kümzüker Ayodhai anir aruba otsü lir. Ravana ya tekolak ter aketba moijing ta Hindu yimsü nung jembir. Aji oda, Rama chubai arem nung shitsütem teyari agia tekolak ter aketsang moijing Ravanaji lasang agi temulungjang ateta kaseter külen, pa kinungtsü Sita kümzüka otsü bilemteta amongba benjongji Dussehra, Durga Puja benjong ya lir. Ibayongji, iba benjong nung ya pelatepa chiyonga ajemba aser tekülemdaki orr Durga tsüngrem külemba dang masü saka Ramai tekolak ter aketsang moijing Ravana akokba tamaitü, Hindu nung tamangertemi süjen aser monü agi Ravana mesüka yanglur rongdoker. Tanü India tesem balala nung, government anema nübertem longkak aيتدang mesüra yimten yimsüsür kari aibelenba anema tejashi sayudang, nübertemi yimsüsürsangji mesüka süjen mesüra monü agi kürak yanglur tejashi sayua mi agi rongdokba yimya ya Dussehra benjong nung Ravana mesüka yanglur rongdoka pelatepa amongba nungi ajizüka beshiba mapa ka lir. Atangji, tetenzükba otsübo memetet saka tangari kanga peta inyaka anguba agi, joko asenokia khenkhenbo government dang mepela dang, tejashi sayua yimsüsür kar mesüka süjen aser mozü agi yanglur rongdokba angur. Dussehra benjong ya anogo ter chiyonga jema pelatepa amongba benjong dangbo masü saka anogo kabo lumir aser iba sülenjia Hindu nung rongnungsa süaka shi achir kintema shi maden aonsutsü denang chiyonger. Iba amaji, Hindu nung yimsü nung akangasünga amangertem asoshibo Dussehra benjong amongba tepiyong ya tsüngrem külemba mong lir. Item benjongmong sobaliba ajak abensaa monger külenang anogo ternübuba, aji benjongmong tesüsaba nü, parnok benjongmong piyong külemba Durga tsüngrem süngyanglu to loktii bener ayong bushia oa yangji enoktsütsü. Durga süngyanglu, Dussehra benjongmong temer külen ayong nung ajungoktsüba tamaitüsüji parnok tsüngremji la alidaki meyipa yoker ta parnok amanger. Aji oda, Hindu nung asoshi Dussehra, Durga Puja benjong ya tamajung madak tajungi takok anguba, Ramai tekolak ter aketsang moijing Ravana akokba anogo aser mapa bilemteta amongba benjongmong lir. Joko, Ramai Ravana ket nungi pa kinungtsü Sita kümzüker, par chuba yimli Ayodhya-i Sita anir aruba anogoji Diwali lir aser iba Diwali benjong ya Durga Puja benjong ser anogo 20 nü buba nung amonger. Iba ama alima süngyanglu külemertemi parnok tsüngrem külema amongba den asenok taküm Tsüngrem külemertemi asenok tamangba dak sendakba benjong aser anogomong Christmas, Palm Sunday, Good Friday aser Easter Sunday amongba yimyatem medemdangra, taküm Tsüngrem külemertem dang nungibo tasü tsüngrem süngyanglu külemertemiang tajungba aser süoki taiba sarasadema amongba asenoki angur. Atangji, Dussehra benjongmong ya parnok asoshi tekolak ter aketba temenen madak takok anguba anogo, terlepzüc mong lir. Aji oda, kodang asenoki tangar yimsü Hindu aser Muslim nungertemi amongba benjong aser anogotem indang meteta asenok tamangba yimsü benjong aser anogomong den medemdangdir, asenok temoatsü angutsü aser asenoka tamang nung akangshitsü.

OLEMSABANG

Kechiba ILP & RIIN inyakyim takok ngua meinyakteter ???

~ L.Kika Pongener.

Ni aibelener ka mesura Inner Line Permit (ILP) ya Indian Constitution Articla 371 (A) asen Naga nung atema balaka shiteta yutsüba temzüng-ozüng agi melaba, aser 16th Point Agreement nung keta aliba inyakyim ka asütsü sudi. North-East India nung asen Nagaland den State kar dak alaka tanga State nembo aginuyongjia magütsüba temzüng-ozüng ka, asen Naga nung atema balaka shiteta yutsüba temeden ka lir. Anungji asen Naga nung senso ajaki iba ILP ya kanga metsüngareta wazüka ayutsüla aser mapa küma inyaksüla. Tesuiba mapang asen Ao lima Mokochung Jila nungbo, Ao Kaketshir Mungdang (AKM) aser Ao Lanur Telongjem (ALT)-i anir senso nubur ajaki temulung agüja nendaka inyakba agi takok ngua inyaktetogo, ibajagi asen Ao lima nungbo tanü tashibo iba tebilemtsü khuret ya kanga tulukabo mali lia arudagi. Ajisüaka, Naga lima tanga District kar nungbo tanü tashi zübazüba-a toktsüba ajanga iba tebilemtsü khuret ya ano manenisa lir. Talisa Dimapur Jila nungbo ano tanü tashi kangasa tamakok jenjang nung lir. Aji oda, kodaser Dimapur Jila nung iba tebilemtsü ya meshi-meshia agientsü makoker (?)...ta jungjunga bushidangra, tanga küli aika alitsü akok, saka kanga tongtipangba küli kaji, asen Naga nung aikati ozüngi memelaba tsüma-longmar talisa 'Bangladeshi Refugee'-tem ya lisen-yimsen küma aodak parnok anioka lidaktsür, alu ayimtsü, Nashi, Ak, An metsütsü atema labour/attendant ayur, takar/tulurtemi kimong-lumong tulu anuktsü atema parnokji amshir, yamala mapatem nung parnokji amshiba agi tanü tashi iba mapa ya tamakok nung lir. Ano aji tang masü, asen Naga nung karibo ozüngi memelaba tsüma-longmar denji kibalembua jala-jabaso sosema lir. Ajiser parnok jala-jabasotemji asen Naga nung tenung jatsür Naga nung senso/lisopur temeden agütsür yua lir. Iba amaji mebilemdangi inyakba jagi kopi meli-i Dimapur District nungbo itum tsüma-longmartemji asen Naga nung lisopur menepa nutsüng yongsuk küma aotsü ana nung lir. Aji oda, iba amaji parnok den kibalempuba (Inter-Marriage) jagi Dimapur jila nungbo ano tanü tashi mapa küma meinyakteti lir. Anungji iba ILP inyakyim ya shitakba (Reality) nung takok ngua inyakdi ta bilemra, tamasa takar/tulurtemi pei ajangzüksü bilemba/pei ajung asaba shisatsü ya endoktsüla. Takar/tulurtemi tamasa pei kimong-lumong anuktsüba mapa nung yua aliba ozüngi memelaba tsüma-longmartemji agientsüla. Ajiser, Naga nung kin shia nung Hoho-temi pei pei kin senso rongnungi shirnoksa tsüma-longmar ozüngi memelaba kintem den kibalembua ali parnok dakji action agitsüla aser agientsüla, ta-ka temzüng-ozüng takang kar yanglur meinyakra, iba ILP inyakyim ya kodanga meshimeshiabo takok mengutettsü.

Ano tang Register of Indigeneous Inhabitants of Nagaland (RIIN) inyakyim ya mapa küma inyaksüba atemzüker sernung, ano tanü tashi mapa küma meinyakteti tamakok nung lir. Iba inyakyim yagi 1963 küm Nagaland State manguba mapang tashi nung arua alir tsüma-longmar/tangar kin ajak nem lisopur temeden agütsütsü, saka iba sulen arurtem nembo lisopur temeden (Permanent residents) magütsütsü ta asüba inyakyim ka asütsü sudi. Aji oda, iba RIIN inyakyim ya mapa küma meinyakteti zübazüba-a toktsüra küm ishika tsüngda nung tsüma-longmar ozüngi memelaba kintem nem asenok Naga nung senso tejangja lisopurtem moksepdaktsütsü. Itum ozüngi memelaba kintem asenok chichiba Naga nung lisopurtem madak tashi amshitsü aser oda oda lia lia-bo parnok dang masüngdangi mapa kecha meinyaktetsüsa tensa mapang kati meneptsü. Aji oda, tang tanga sunga joko mapatong aika nung parnok asenok lisopur madak tashi amshidagi, asenoki jungjunga mebilemdanger tang ashi, Naga lima nung Jila tulu ajak nung tongtipang shishilempaba (Business establishment) mapa ajunga tsüma-longmartem ajepbanger jenjanga parnok tunutsü atur, oda kechisarena ajak nung parnok sunutsü asür, saka asenok lisopurtemi parnok dang kecha meshitetsüsa tensa ka küma-dokogo. Kechiyong joko Dimapur Jila nung balaka itum tsüma-longmartem ki-o-jen tulu yanglur, kimong-lumong tulu alizüka yur, asenok lisopur dang nungi parnok rongsen nunga takaba, shisatsü temetetba nunga tuluba, tekolak-a parnok tuluba, ajioda, parnok nem kechisarena ajak nung asen lisopur amokbangdaktsüogo. Surabangla, tang iba RIIN inyakyim ya mapa küma meinyakteti tsükdaker aliba ya kechi küli ajanga meinyaktetsüsa aküm (?)...ta jungjunga bushidangtsüla. Ashiko, itum tsüma-longmartem yagi kodang iba RIIN inyakyim ya mapa küma inyakdir, parnok libalirotsü mesademsü asüba agi aji meinyakdaktsütsü atema, lisopur rongnung pei sasa tongtipang nisung/tashi tulu akaba nisung ama bilemba (Self Style VVIPs) yamala nisung kar sen agi alizüker mapa küma meinyakdaktsür asü...??? Mesura Politicians, Bureaucrats, Law makers, NGO Leaders etc. kar supokrem agi tebang nembangtsür, tetsükdaktsü küli aika sayua mainyakdaktsüi soitta ayur asü...???...ta nubur aika mulungjang nung asüngdang...!!!???

Ano Naga nung lisopurtemi metettsüba tongtipang kaji, Dimapur temeküt nung Naga nung temeja aliba yimtsüng nung, tsüma-longmar, Naga nung masüba tangar kin nem lisopur temeden keni magütsütsüla. Tatishitsü ka... Aor temeja alidak yimtsüng nung, tsüma-longmar, mesura Naga nung masüba tangar kin dang saru tataktet ka Rs.10/-, Rs.20/-, Rs.50/- etc. (Registration fee) meshir Aor senso Register nung tenung zülüokra, parnok nemji Aor senso temeden agütsür asütsü. Aji oda, na aser ni yimten nung maongka (Advantage) kar aginudang, mesura nutsüng-nubu (Enrollment) aika ta sunudang, parnokji zübazüba Aor senso kümdaktsüra, ibajagi Naga nung ajunga nem tebilemtsü khuret tulu bentsür arutsü. Anungji yimten nung takok arishitepdang, mebilemdangi tarutsü nung Naga nung ajak khuret asütsüsa meinyaktsüla. Atangji, asen Naga nung ya jungjunga bilemdangra 'An molokbang nung atem' amai asen sasa asen apohtsü sang asortem lir.

METONGSHITSÜR

Tir Yimyim adok- 6 Dated October 13, 2021 nü Olemsabang Tapak "Last Paragraph" nung grammar tetezüji "Otang Olen" ta alibaji tazüngertemi "Otong Olem" ta metongshia züngdaktsüner. Aibelenba atema sasar.

~ Tezülur

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

ICC-i Myanmar kübok Chin State nung refugee tem yarir



Chin State nung ICC-i teyari agütsüdang tangokba noksa nung angur.

October 13, 2021: Taküm February ita nung Burmese Army (Tatmadaw)-i democracy lenir, Aung Sang Suu Kyi-i aniba sorkar atsüngdokba sülen nungi tenzüka Myanmar nung raramanener aser tensa mesüngjemer.

Tang iba linük nung rara ajanga Khristan nütsüng timba aliba Chin State nung alirtem tamajungba kongshir. Sepai yimsüsüba anema Civil Disobedience Movement (CDM) tenzüka sülen sepaitem den raratsü atema Chin nung Khristan aika local defense forces nung denogo.

Tang local defence groups

aser sepaitem tsüngda rara ajanga Chin state nung nisung aika jenshiogo, aser ibaji ajanga Arogotemi Tenla kima Internally Displaced Persons (IDPs) lapoka parnok jenokdaksür anepaludar.

Chin Baptist Convention-i alima linüktem dang Mindat jila nungi IDPs atema teyari meshiba nung ajemdaker ICC-i teyari agütsür.

Mindat area nung Arogo 40 shi lir aser ICC-i mejangjaba tesem ka nung IDPs 300 shi yaridar. Iba tesem nungji aliba Baptist Arogo tenla ki ka nung school aser clinic amenoker yirua alirtem yaridar. Iba tesem nunga ICC-i IDPs 100 shi nem

chiyungtsü agütsüogo.

ICC den jembidang Baptist Arogo nungji Pastor-i par Arogo nung IDPs jenokdaksüba lemsatapa liasü.

Pastor-isa, "Onoki tenla agüjang ta mesüteter, iba denji külemi National Unity Government (parallel government) dang nungia teyari memeshiteter, kechiyong ibaji ajanga onok Arogotem aser IDPs-i timtem ajurutsüa akok. Ajsüsüka alima tesem balala nungi külem Khristantem dang nungi yamai teyari anguba ajanga onok melung ajungmesor. Iba ya senotsü dang nungi sentiba. Atangji onoki kanga pelar," ta lemsatap.

Pakistan kübok Okara district nung Khristan ana khaset

Lahore (Pakistan), Mongputeni October 13 (Agencies): Pakistan nung alikiojen tsütsü mangatettep ka adoka ibaji tamangba yimsü dak sendakba ken o ka kümdaksüba sülen Muslim nung telok kati Khristan ana khaset, ta International Christian Concern (ICC)-i metetdaksü.

Pakistan nung meimchir temeden atema inyakertemi ashiba agi, Pakistan nung minority tem anema inyakba dak sendakba nung Khristan ana ya khaset.

October 8, 2021 nü Okara district kübok Village #2A nung Muslim nung telok kati Khristan ana- Yaqoob Masih aser par adianu, Haroon Masih na khaset.

Tenük kuli alirtemi ashiba agi, ali-kiojen nungi mangatettep adokba sülen ibaji Khristan aser Muslim nung tsüngda mangatettep ken o ka akümba ajanga Yaqoob aser Haroon na khaset.

Osangbener den jembidang Khristan aser tenük kuli alir, Indriyas Masih-i, "Muslim nung kibong kati yimdak ozü kibong aser Khristantem kanga sempaa liasü. Yimdak Khristantem renlokba parnoki maginü, ibayongji aluyimtsü atema ali dak sendakba contract

yanglutsü atema parnoki nokdanga liasü," ta metetdaksü.

Indriyas-isa, aluyimtsü atema Khristantemi ali acre 6 'lease' asütsü mepishia liasü, iba sülen ita aika mangatettep adok saka tesüsa ketdangsertemi Khristantemi mepishiba mela.

"Iba tatalokba anogo nungji onok pongu alui oa liasü, iba mapang nungji nisung 12 shi arua onok amak aser Yaqoob aser Haroon na khaset," ta Indriyas-i ashi.

Indriyas-i Muslim nung 9 maitsübo jangjaogo. Parnoki Khristantem anema yimyim ayima Khristan pongu dak injang khaloktsü.

Police-i aibelenertem anema First Information Report (FIR) ka benokogo aser kobi melii aibelenertem nem temerenshi agütsütsü imlar.

Meimchir temeden atema inyaker, Asif Muniwar-i, "Muslim nung Khristantemji alar ama züngshir. Iba linük nung Khristantem temeden mali, taküm akhümket mali aser tekümüzkba mali. Loktiliba nung Khristantem aser tanga minorities anema inyaker," ta metetdaksü.

"Khristantem nem security agütsütsü atema sorkari inyaktsüla aser Okara district nung takoksa angurtem aser parnok kibongtem nem ochi

temeden agütsütsüla," ta Muniwar-i ashi.

Pakistan nung tamangba yimsü balala tsüngda akhümtsübutep maliba ajanga Muslim aser Khristantem tsüngda rara aiben adoker. Talisa Muslim nungertemi Tsüngrem mezüngmeshiba ozüngtem nung ajemdaker Khristantem nem tai tongloktsür.

Tesüiba mapangtem nunga Tsüngrem mezüngmeshiba ozüngtem nung ajemdaker loktii Khristan aika tepsetogo.

Pakistan nung nütsüng shilem 1.6 shi dang Khristantem lir aser iba linük nung Khristantembo 'second-class' sensotem ama züngshir.

International Christian Concern Regional Manager for South Asia, William Stark-i, "Yaqoob aser par adianu Haroon na tepsetba atema International Christian Concern-i jashia bilemer. Onoki parnok kibongtem atema sarasademtsür. Pakistan nung maneni Khristantem anema inyakba atema onoki tebilemstü akar. Pakistan nung kiralongra aser Khristantem anema inyakba nokdangtsü atema sorkari inyaktsüla. Tamangba yimsü nung ajemdaker shinga 'second-class' senso ama mezüngshitsüla," ta metetdaksü.

ANOGO ABEN TSÜNGREM DEN

Nai khrista den temulung asütsü akok

Shibai ni tashi itdaksür Pa dak ni ajak inyaktsü akok. Filipi 4:13

Filipi arogoi pa tenzüka mapa nung yariba asoshi Pauli parnok nem tenüngsang agüja zülu. Yangi pai nübur dang pelaa alitsü ashi (t.4), kecha atema shisa mebulutsü ashi (t.6) aser ochi, akhümtsübu aser shidakba nung temulung ayutsü ayongzük (t.8). Idangji pa nüngdak nung koda talubusa angu (rishikangshiba indang mejembi) iba indang ashi. Pai ashi, "Shibai ni tashi itdaksür Pa dak ni ajak inyaktsü akok." Pai kechi tetezü ashir? Pai inyaknüba ajak inyaktsü Khristai pa tashi itdaksür ta pai ashir asü? Ibaji masü! Pa peria akadang aser sensaka alidang Tsüngremi pa nem temulung süa lidaktsüba indang pai jembi.

Yisu tenüng tetshia nai inyaknüba inyaktsü iba tekong yagi ashir asü? MASÜ! Mapang tajung tamajung ajak nung Tsüngremi mulungba nai atalokdaksütsü Tsüngremi ne nem tashi agütsüba indang iba tekong yagi mejembir. Rishikangshi mapang nunga nai aremzüka Pai mulungba atalokdaksütsü akok. Kechi asoshi na aja iba nung rangloker nai tashi anga aser tamang agi apusora, nai takok angutsü, kechiaser Pai na tashi itdaksütsü. Khrista asoshi mapa kar inyaktsü na tashi nüngdakra Paul ama kümang, shibai tashi mait nunga temulung süa liasü.

"Aji asünung Khrista atema mekokmin nunga uludi" (2 Kor. 12:10).

Sarasadem: Oba, kü taküm nung Khrista aliba ajanga ni kechisarena nung temulung süa alitsü kü dang yariang. Amen.

Yihuda nung anati Africa Khristan missions atema tenla agütsü

October 12, 2021: Medical teyari junga manguba Africa nung Christian medical mission maneni inyakdar, aser Yihuda nung apuani ka nati iba mission atema US dollar million 18 agütsüogo.

Osang angazükba agi, Africa nung Khristan medical missions atema tenla agütsür kibongji Yihuda nung Mark Gerson aser pa kinüngtsü, Rabbi Erika na lir aser tesüiba küm aika tsüngda tenati tenla jenti agütsüogo. Item ama tenlaji ajanga Khristan missionary doctor temi Africa tesem balala nung sensakertem nem medical teyari agütsür.

Interview ka nung jembidang Mark-i, "Shishilembaba tsütsü süaka tajangzük manguba maparen tsütsü süaka investment tajungtibaji Africa nung inyaker Khristan missionary doctor tem yariba lir," ta metetdaksü.

Paisa, khenkhenbo nisung 10,000 nungi 40,000 atema doctor kaka dang atar, ta metetdaksü.

"Senotsü ishika dang liaka Khristian missionary doctor temi mapang talangka tenzüka aruba ngua onok süngmanger," ta paisa metetdaksü.

African Mission Healthcare website ajanga ashiba agi, alima nung tashidak balala shilem 24 bo Africa nung lir saka iba continent nung global healthcare workers shilem 3 dang lir.

Mark-i ashiba agi, Africa nung aliba linüktem nung doctor kar dang specialists mesüra surgeons lir, ibayongji parnok aikati surgery magiteter.

"Iba dak alia nisung aikati C-section magiteter, ibayongji Uganda aser tanga linüktem nung C-section agütsüpur tetsür shilem 20-i dang surgery agiteter," ta pai metetdaksü.

Iba dak sendakba nung tenla timbaka C-sections atema agütsütsü aser tanüngba tenlaji healthcare "infrastructure, medical oxygen aser hospital atema amshitsü," ta paisa shisem.

OLONG PAITEP # 5966

1		2		3		4	5			
				6						7
		8								
9				10		11				
			12					13		
						14				
16						17				

TIPLÉN		LANGTSÜNGLEN	
1. Nisung jenti - (5)		1. Tenük telong - (9)	
4. Tsük rudenba - (5)		2. Committee dang ajar - (5)	
6. Temzüng tesashi - (5)		3. Yagi ki okdoker - (7)	
8. S_ _ _ i - (3)		5. Yim lenmang - (5)	
9. Nisung rongnung telemsa - (3)		7. Temoatsü keter meyipa aruba - (9)	
10. Anogoshi - (4)		11. Kanga junga menemba - (7)	
12. Ajanga aor - (4)		12. Kenyongi majinü - (5)	
13. Tsük rizüngdak - (3)		13. Rong kanga tulu - (5)	
14. Tebang nungi adokba - (3)			
16. Süngdong tatembangtiba - (5)			
17. Meputep - (5)			

OLONG PAITEP # 5965 TELANGZÜBA

TIPLÉN :	LANGTSÜNGLEN :
1. Tanga, 6. Wara, 7. Rajang,	2. Anga, 3. Yabang, 4. Tarok, 5. Orak,
9. Anük, 10. Jenjang, 11. Alar,	8. Ainer, 9. Anema, 10. Jabili,
14. Ngashi, 15. Nala, 16. Mechi.	11. Among, 12. Miim, 13. Anem.

SANNÜKER I ALOKBA TAMANG TENDANGA TAMANG KULI KARASUNGDANGER

Sannüker : Alokba nai nü tamang yari tamang aser teimla indang kar rasa ashitsu akok asü?

Alokba 1 : Küpu cancer agi shiranger joko küm jungnúa hospital balala ICU nung dang monga sünzüdaki doctertemi joko pa anogo ana asem tsüngda tangu sashi anentsü ta ashir pa anepalurtem docter nurse aser kinungertem dak covid 19 positive meliaka pa dakbo covid 19 positive yakta putettsütsü tamang aser teimla lir.

2. Dokan kishi aser jaratem nung "WE ARE VACCINATED NO MASK NO ENTRY" Ta zülur maloka ayuba ya tamang aser teimla ta ajatsü akok.

3. Government-i tamangba yimsü balala ajak dang joko sentep nung 100% senteptsü melaka town tem nung nenok pastortemi devotional sentep melapoki dang tashi social media dak metaloker aliba dang ya chichiba tamang aser teimla ta ajar.

Sannüker : Aya.. Ya mekaka!!!!OH..ALOKBA

~ Lilir : WhatsApp

TANÜBO NAI LANGZÜANG

Q. "Exercise Malabar" ta asüba ya India nung koba Armed force-i agir?
 [A] Indian Army [B] Indian Navy
 [C] Indian Coast Guard [D] National Security Guard

(Taruba adok nung onoki langzüsü)

YASHI ADOK TELANGZÜBA : Aug 18, 1948

AO OSHI ANGAZÜKDAK:

TANÜ ANGAZÜKTSÜBA OJANG



Laojia
 (adv) mangazüa, laotsü ama jajaba (unsteady walking)
 * Yi agi meseper yimdong nung laojia laojia senzübaji maksü lir.

Laok
 (n) tzü mesür aruba, süng agi ayong temdangba (water irrigation, placing wood to cross over)
 * Tzü mesür arua **laoka** alidak süng ka laoker onok ajanga ao.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo

Happy Birthday

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA

IPL 2021 ASAYA NUNG ASAYARTEMI 6s TIEMTIBA ZÜKTETER 10 YAMAILIR :

	MAT	INNS	RUNS	6s
1 KL Rahul (Punjab Kings)	13	13	626	30
2 Rituraj Gaikwad (Chennai Super Kings)	15	15	603	22
3 Glenn Maxwell (Royal Challengers Bangalore)	15	14	513	21
4 Faf du Plessis (Chennai Super Kings)	15	15	547	20
5 Mayank Agarwal (Punjab Kings)	12	12	441	18
6 Ambati Rayudu (Chennai Super Kings)	15	13	257	17
7 Sanju Samson (Rajasthan Royals)	14	14	484	17
8 Prithvi Shaw (Delhi Capitals)	14	14	461	17
9 Kieron Pollard (Mumbai Indians)	14	13	245	16
10 Nitish Rana (Kolkata Knight Riders)	15	14	370	16

SUDOKU # 6007

TELANGZUBA # 6006

	2		8	7	3	5			1	5	2	9	6	4	3	8	7
3	5	6			9		7	4	4	9	6	8	7	3	5	1	2
			5	6	4		3		3	7	8	1	5	2	4	6	9
		4				1			6	1	3	7	9	5	2	4	8
7			9	5		2			5	4	7	2	8	6	9	3	1
2	3				6	9		5	8	2	9	3	4	1	7	5	6
	1	2				3	5		2	6	5	4	1	7	8	9	3
9		3			5		4		7	8	4	6	3	9	1	2	5
8	4				2	7	9	1	9	3	1	5	2	8	6	7	4

OJANG LUTEP # 5552

RIPEA : [][][][][]
 ANDG : [][][][]
 IALKA : [][][][][]
 EPI : [][][]
 GAN : [][][]
 TEONGROKBA : [][][][][][][][]
 AAM : [][][]
 GATANR : [][][][][]
 NGDA : [][][][]
 YUSAR : [][][][][]

OJANG LUTEP TELANGZÜBA # 5551

TAJANGZÜK MALIBA MAPAREN NUNG MAPANG INDOK MESASAI INYAKBAJI KODA TAMASHI

TAN HOPTA ATEMA - KOMA SÜLA ?

Q. Asenok arogotem nung tetsürtem nema sannükla dang masü saka sannükba mapa inyakdaksü nunga koma süla ?



Shimla, October 13, 2021: Bodhbarnü Himachal Pradesh kübok Kinnaur district nung Deputy Commissioner, Abid Husain Sadiq-i osangbenertem den jembiba noksa nung angur. India nung nisung ajaki coronavirus vaccine dose anaprong agiba mezüngbuba district ji Kinnaur district lir.

Africa nung kiralongra ya tebilemstsü onük ka kümogo: India

New York (US), October 13 (Agencies): Union Minister of State for External Affairs (MoS), V Muraleedharan-i, Africa nung kiralongra kanga kera prokshiba ya tebilemstsü onük tuluka kmogo; Africa nung aliba linüktemia kiralongrartem ajungshir aser ibaji ajanga telemsa adokdaksür, ta metetdaksü.

adokdaksür," ta metetdaksü. "Africa nung kiralongra kanga kera prokshiba ya tebilemstsü onük tuluka kümogo. Ano kanga tia maka kaji, züngsem linüktemi kiralongrartem aser telok balala ajungshir," ta paisa shisem. India-i mapang ajak nung partner linüktem den longjemer yimjung atema shilem tajung agir, talisa Asia aser Africa nung LDCs, LLDCs aser SIDS den inyaker, ta pai ashi. Tang Afghanistan tensa dak sendakba nung Minister of State-i, "Kabul nung yimsüüba menden melenba ya ken o

jembiba ajanga masü aser sorkar nung ajak medendaksü. Afghan nung ajak sorkar nung dendaksütsü atema onoki aiben ayongzüka aruogo," ta pai ashi. "Alima linüktemi Afghanistan dang nungi aika imlar, aser item rongnung kiralongra anema raratsü atema UNSC bangzüng 2593 nung shia lir. Ibaji akhümsübutsula aser nangzüka ama inyaksüla," ta paisa ashi. Terenlok dak linüktem nung terenlok, tesünep aser azükaru alitsü atema India maneni tongti tongshi ka asütsü, ta paisa shisem.

Sorkari J&K nung ajak nem security agütsütsüla: Omar Abdullah

New Delhi, October 13 (Agencies): Tawa Jammu & Kashmir nung civilian aika tepsetba dak sendakba nung Bodhbarnü taoba mapang Jammu & Kashmir nung Chief Minister inyaksang, Omar Abdullah-i, Jammu & Kashmir nung nisung ajaki tsüba bilemer, anungji sorkari tamangba yimsü kecha mebendangi nübur ajak nem security agütsütsüla, ta ashi. Taküm J&K Union Territory nung tamangba yimsü balala amanger civilian 28 tepsetba dak sendakba nung National Conference (NC) lenir Abdullah-isa, tawa Kashmiri Pandits aser Sikhs nung aika tepstoogo, ajisüaka parnok jena maotsü ta onoki imlar, ta ashi. "Kashmir nungi minorities jena maotsü atema asenok ajaki tajungtiba inyaksüla," ta ashi.

Srinagar nung interview ka nung jembidang pai, "Iba tensa ya süngjemsü aser minorities kümzüka alitsü atema inyaksüla. Ajisüaka tongti shilemji ketdangsertemi agitsüla, saka majority ama onokia (Muslim) ozü shilem inyaksü," ta metetdaksü. Paisa, "Iba ya intelligence osang liaka tamakok anguba ama nibo bilemer. Iba atema police kija nem tai metongloksütsüla, kechiyong police, paramilitary aser sepai ajaki kiralongrartem anema rarar. Iba ya ajak tamakok lir," ta ashi. "Tesüba ita ishika tsünga minorities, talisa Kashmiri Pandits amaker, anungji minorities kümzüka alitsü atema ajaki inyaksüla," ta pai ashi. Abdullah-isa, taküm June 24 nü Ato kilonser, Narendra Modi-i Delhi aser Srinagar na

tetsünga talang ittepa aliba ya anaba kümdaksütsü ta jembio, ta ashi. "Iba tsütsü asenoki mera agia inyakra asenoki timtem aika ajemdaksütettsü. Asenoki meshimeshia mesamatsütettsü saka ajema kümdaksütettsü," ta pai ashi. "Srinagar yimti nung telungpurtem samatsü aser Ganderbal den Budgam districts nunga samaja liasü. Ajisüaka item tesem nung ano kiralongrartem aliba ya tejashitsüka lir, anungji sorkari ibaji asadangtsüla aser metongshia mera agia inyaksüla," ta pai ashi. Abdullah-isa, "Afghanistan tensa ajanga Kashmir aser tanga districts nung security tensa meraksatsü, ajisüaka UT nung aliba kiralongrartem melung ulutsü," ta ashi.

Per amshia kinüngtsü tepsetsang taküm piyong tepuokdak ayutsü

Thiruvananthapuram, October 13 (Agencies): Yaküm Kerala nung tebur kati per amshia pa kinüngtsü tepsetba ken o dak sendakba nung Bodhbarnü (October 13, 2021) Kerala nung sessions court kati pa taküm piyong tepuokdak ayutsü obendang agütsüogo. Tebursang jagi 'cobra' ta ajaba per agi pa kinüngtsü mechia südaksü, ta court-i pa aitsü.

arrshi küm 28 lanur dang lir, anungji pa nem tasüba temerenshi masü saka taküm piyong tepuokdak ayutsü atema dang obendang agütsür, ta metetdaksü. Lawyer kati ashiba agi, nisung tepsettsü merangba atema court-i Kumar akümüli piyong tepuokdak ayutsü, mim amshiba atema küm 10 tepuokdak ayutsü aser kuli raksatsüba atema küm tenet tepuokdak ayutsü obendang agütsü, ta metetdaksü.

October 11, 2021 nü court-i, Sooraj S Kumar-i nisung tepset, mim amshi, kuli raksatsü aser per amshia pa kinüngtsü arrshi küm 25, Uthra tepset ta aija liasü aser Bodhbarnü pa nem temerenshi obendang agütsü. Additional Sessions Judge-VI Manoj M-i, iba ama ken o ya kanga buluabo mataloker, ajisüaka tang aija alisang ya

Kerala DGP-i, tai tonglokja alisangji aitsüogo; scientific tasa amshia nisung tepsetba ken o bushisüngdanga kuli meteta liasü, ta metetdaksü. Court-isa aibelensang dang senchi lakh 5.85 achi. Yaküm May ita nung Sooraj Kumar-i pa kinüngtsü amoi oa lia per nem la mechidakja südaksü.



Thiruvananthapuram (Kerala), October 13, 2021: Bodhbarnü Thiruvananthapuram nung BJP nung inyaktermi longkak aita Police Commissionerate office-i aoba mapang nung police-i tzu khaloktsüba noksa nung angur. Thiruvananthapuram Corporation office building atema saru saruba tsütsü ochimashirtem puang, ta takhangba agüja BJP-i longkak ait.

Congress lenirtemi Tir dang MoS Ajay Mishra anenang ta akhang

New Delhi, October 13 (Agencies): Bodhbarnü New Delhi nung Rahul Gandhi densema Congress lenirtemi linük Tir, Ram Nath Kovind ajurua Lakhimpur Kheri tatalokba ken o dak sendakba nung Union Minister Ajay Kumar Mishra anenang, ta takhangba agütsü. Party lenirtemisa Supreme Court nung tang teinyakdak judge ana nem iba tatalokba ken o bushisüngdangdaksütsüla, ta takhangba agütsü.

ta Tir dang mepishiogo, kechiyong iba tatalokba ken o nung Minister Mishra'er jabaso, Ashish Mishra nem tai tonglokja lir, ta metetdaksü. Ashish Mishra anema FIR benoka lir aser Lakhimpur Kheri nung gari agi aluyimertem menüngsetba ken o nung pa nem tai tonglokja lir. "MoS for Home menden nungi manendaksü tashibo iba ken o ya junga bushisüngdang mesütettsü. Iba ya asür kibongtemi akhangba dang masü saka aluyimer ajaki akhanger, anungji iba ola ya mesongtemtsüla," ta paisa ashi.

Party-isa shidi ka ajanga Lakhimpur Kheri nung tatalokba osang tejangja Tir nem metetdaksü. October 3 nü Uttar Pradesh kübok Lakhimpur district nung rara adokba mapang nung aluyimer pezü densema nisung ti asü. Tir ajuruba sülen osangbenertem den jembidang Rahul Gandhi-i, Lakhimpur Kheri tatalokba ken o jungjunga bushisüngdangtsü atema MoS Home, Ajay Mishra anentsüla,

Tir ajurur Congress lenirtem rongnung A K Antony, Ghulam Nabi Azad, Mallikarjun Kharge aser Priyanka Gandhi Vadra nung densema liasü. Tiri kechi telangzüba agütsü?, ta osangbenertemi asüngdangba langzüdang Priyanka Gandhi-i, "Iba dak sendakba onük ya pai (Tir) tanüsa sorkar den jembitsü ta shiogo," ta metetdaksü.



October 13, 2021 nü South Kashmir kübok Tral nung rara adokba sülen Srinagar nungi sepaitem rara adokba tesemi aoba noksa nung angur.

Mapuche mepetmesü mechi Chile-i state of emergency sangdong

Santiago, Mongputeni/Oct. 13 (Agencies): Chile linük south tsütsü region ana nung Mapuche Indigenous people aser security forces tsüngta rara tenzüka mechi Tir Sebastian Pinera-i iba tesem nungya state of emergency sangdonga sepaitem yoka lir.

Mapuche nisungtem ya par akhi tetsü-tebou nungi senmang ama aliba li tanaben meyiba meshir aser par sasa yimsü asütsü akhanger.

"Linük south tsütsü Biobio aser Araucania region nung aliba province pezü nung tensa azioktsü mechi 'state of exception' sangdong aser sepaitem yok," ta Pinera-i Mongulbarnü sangdong ka nung ashi.

Province pezü nungya telungpur temi temesepba mozü shibelenba, kiralongraba aser mapa tamajung inyakba angur aser azüdokshi nung tai maket civilian aser police tem tepseter, ta arishi küm 71 tain leniri ashi.

Mapuche ya Chile nung Indigenous telok tulutiba lir. Chile nütsüng yongsük million 19

aliba nungi parnok nütsüng yongsük million 1.7 shi lir aser parnok ya timba south nung alir.

Farm aser logging company tem kibur süa aliba ali ya parnok nem meyipa agüjang ta item lenirtem yagi akhanger.

Parnoki akhangba nung telangzüba ka magütsütetba ajanga telungpur temi küm ter shi trucks aser nija meyong ki-o-jen nung timtem agütsür.

Mapuche autonomy nungi longkak aita tetsüng agi jajartem aser security forces tsüngta Deobarnü linük yimtiba, Santiago nung mangatetep adoka nisung ka tepset aser 17 yirua liasü. Taoba mapang Columbus Day ta ajaba Dia de La Raza anogomung nung iba lendong ya ajuru.

Ita ishika tsüngta telungpur tasü taitba akumer aser parnoki ki-o-jen raksatsür aser ali agir, ta osangbener kati Santiago nungi ashi.

"Tir dang par telok nungi conservatives tem aser truck driver tem densema danga telok temi Araucania amaktsü

ajungshir, saka pai tang tashi temelaba magütsür," ta osangbeneri ashi.

Araucania region nung tensa tamajungba akumer aser iba region ya timba mazüokteti kumogo, ta ashi.

Iba state of exception ya Biobio region kübok Biobio aser Arauco province aser Araucania kübok Malleco aser Cautin nung hopta ana atema benoka lir.

"Tanü asenok kanga tepenja tensa ka nung alir, kong nisung telok balala nok-o-nü teperi bener police dang tashi tuluba kumogo," ta ruling party nungi Araucania governor Luciano Rivas-i ashi.

Ajisüaka political analyst Lucia Dammert-ibo Pinera indang telemtetba aitsü aser sepaitem yokba ajanga tensa tamajungba akumer, ta ashi.

"Araucania nung aliba teblemstü koktettsü atema sorkari sentong tajung meyangluteter," ta University of Santiago nung professor Dammert-i ashi.



COVID-19 cases tali akumba ajanga Bucharest, Romania nung aliba Bagdasar-Arseni hospital ya COVID-19 unit kumdaktsüba sülen shiranger ka emergency room nung mejanga aliba noksa nung angur. Mongulbarnü Romania nung nisung tasen 17,000 dak COVID-19 tashidak putet aser nisung 442 asü, koba coronavirus tashidak wara tenzüker aogo ka nung iba tashidak putetba timtiba alitsü.

Russia nung COVID-19 agi asüba maneni züiner

Moscow, Mongputeni/Oct. 13 (Agencies): Russia nung coronavirus agi nisung asüba ano Mongulbarnü otsü tasen yanglua liasü, kong iba tashidak kanga kera prokshia aoba menokdangteter aser vaccination kanga anü-alema lir. Ajisüaka ketdangsürtemi linük shibangtsü memolunger.

2020 küm tetenzüklen iba tashidak awara tenzüka sülen Mongulbarnü coronavirus agi nisung 973 asü, koba anogo ka nung asüba timtiba alitsü, ta sorkar indang coronavirus task force ajanga ashi. Russia nung anogoshi iba tashidak agi asüba ya timba ang akumer aser anogoshi iba tashidak putetba ya kanga sashia lir aser Mongulbarnü nisung 28,190 dak iba tashidak putet.

Yamaji anogoshi iba tashidak tali putetaka Kremlin-i linük ajunga nung tenokdangba agütsütsü bilema mali aser coronavirus tenokdangba agütsütsü ya regional ketdangsür nem nungloktsür.

Iba tashidak kanga kera menatepa aoba ajanga Russia

indang healthcare system nung khuret tali agütsür, kong shiranger agi mozüki kanga kera asünger. Mongulbarnü cabinet senden ka nung kembiba mapang Health Minister Mikhail Murashko-i ashiba agi, Russia nung COVID-19 agi shiranger nisung 235,000 mozü kidang aliba shilem 11 teimla kangabo mali.

Ajak agi Russia nung coronavirus tashidak ya nisung million 7.8 dak puteta lir aser nisung 218,345 süogo, ta linük nung coronavirus task force ajanga ashi, koba Europe nung asüba timtiba alitsü.

Taoba ita nungi tenzüka tashidak kanga kera menatepa aoba aser asüba ya vaccination rate ajemba agi lir, ta Russia sorkari tenüng asener. Nütsüng yongsük million 146 jungnüa aliba nungi nisung million 47.8 mesüra shilem 33 shi ang coronavirus vaccine dose mezüngbuba agir lir, aser nisung million 42.4 mesüra shilem 29 shi dose tanabuba agir lir, ta sorkari Hokulbarnü shia liasü.

US aser S Korea-i yimjung tsütsü timtem agütsür: Kim Jong Un



North Korea sorkari agütsüba noksa ka nung North Korea lenir Kim Jong Un-i Pyongyang nung aliba weapons system sayaba tesem ka semdangba angur. Kim-i aiben mayongzüka exhibition ya semdang aser tenük agi manguba mitkar yanglutsü nangzüka region nung tensa mejungi kumdaktsüba atema United States dak tai tonglokja liasü.

Pyongyang, Mongputeni/Oct. 13 (Agencies): United State ajanga tsükchitep adoktsü sentong yangluba aser South Korea nung military buildup ka amenoka peninsula nung tensa mejungi kumdaktsüba ajanga nok-o-nü yanglutsüsa akumer, ta North Korea lenir Kim Jong Un-i ashi.

Pyongyang-i mitkar tashi ulushiba ya pei kumzüka ayutsü atema lir aser rara ka tenzütsü atema masü, ta Kim-i Defence Development Exhibition ka nung jembidang ashi, ta state news agency KCNA ajanga Mongulbarnü sangdong.

"United States-i mapang shia parnok ya asen linük atema tsükchir ka masü ta yimya balala agi sayua arur, saka yangji amangtsüsa parnoki mapa agi mesayur," ta Kim-i ashi.

"Asen dak nungi jakzüker atema asenok tashi ita alitsü nungdaker. Asenok mezüngbuba nung tashi ita alitsü nungdaker. Mitkar tsütsü tang asenoki timtem ajuruba ya küm ter,

pungo mesüra asem tejakdang ajangshiba den khenyongi balala lir. US mechi Korean peninsula nung tensa mela mela mazioktettsü," ta pai ashi.

North Korea ruling party indang osangkaket, Rodong Sinmun nung noksa tem sayuba nung Kim-i iba o ya Hwasong-16 intercontinental ballistic missile (ICBM) densema nok-o-nü tabu balala jakdang nokdaker jembia liasü.

Hwasong-16 ya North Korea indang ICBM tulutiba lir aser iba ya 2020 küm October ita military parade ka nung saya saka tang tashi tendanga mali.

"Asenoki shinga dena rara atema jembishinü masür, saka raraji nokdangtsü atema aser linük tashi temeden wazüka ayutsü atema raratsü tashi ulushir," ta pai ashi.

Korea linük ana ya nok-o-nü tsütsü toktepa arur, kong linük anaprongi advanced short-range ballistic missile aser danga osettem tali tendanger.

South Korea-i tawa par

indang submarine-launched ballistic missile mezüngbuba tendanga liasü aser ano aircraft carriers densema nok-o-nü tulu aser tasen yanglutsü sentong lir. Parnokisa America nung yangluba F-35 stealth fighter tem aliogo.

North Korea-ia par missile programme tali ulushir, aser nuclear bomb yanglutsü atema totzü yangluba nuclear reactor tongtiba tuluba kuma yanglushi tenzükogo, ta dangari asadangteta lir.

United States-i North Korea den mashi mapang diplomatic tsütsü jembishinütsü molunga lir ta ashir, saka Washington-i tenokdangba agütsüba aser South Korea nung mitkar maparen balala inyakba amala sentongtem ali tashi tejangraba mali, ta ashir.

"North Korea atema tamajung bilemba mali ta United States-i ashiba nung tamang katettsü tasak lir, kechiaser parnok tangatetba tai aser mapa meshidak inyaker," ta Kim-i ashi.

Nepal bus tsükokdak nisung 28 asü

Kathmandu, Mongputeni/Oct. 13 (Agencies): Nepal northwestern tsütsü tenem agi sünga aliba tesem nung passenger sünga mena aliba bus ka tsükoka nisung 28 asü aser ano aika yirua liasü.

Iba lendong ya Muru region tezülen Mongulbar nikongdang 12:30 ako meta gari tejaklen tyre ka apokba sülen atalok, ta district ketdangsür Rom Bahadur Mahat-i ashi.

Bus ya southern Banke district nungi Mugu tesem leni aorba liasü aser iba bus nungya nisung 45 shi mena liasü, shirnok Hindu nung Dashain benjong amungi aorba liasü.

"Iba lendong nung nisung 28 asü aser onoki nisung tasü mang jangjatettsü merangba mapang lir," ta Mahat-i ashi.

Yirur alirtem mozü kidang

anepalutsü atema helicopter amshia bener ao, aser ketdangsürtemi lendong atalokba tesem nung asürtem aser takum jemburtem maneni bushiba mapang lir.

Bus driver temi senzüsempogertem lenmang nung anidener, saka passenger karbo tenüng zülüoka mali, anungji bus nung nisung mena aliba tejangja ketdangsürtemi memeteter.

Iba Himalaya linük nungya tang ama gari lendong mapang shia ajurur, kong lenmang majung den gari junga anepalu masü amshir aser gari kumdanga manir.

2019 küm Nepal nung gari lendong 13,000 jungüa atalokba nung nisung 2,500 dak tema süogo, ta sorkar data ajanga sayur.

Noklak nung tetushi agütsüba sentong agi



Dimapur, Mongputeni/October 13 (TYO): New India @75 Awareness Campaign kübok Noklak district nungi mezüngbuba shilem nung takok angurtem nem tetushi agütsüba sentong ka October 12 nü DC Conference, Hall Noklak nung agiogo. Iba sentong ya HIV/AIDS, TB & blood donation dak sendaka lir. Sentong nung o jembiba mapang Deputy Commissioner

Noklak, Hiazu Meru-i, kaketshirtem dang taküm nung pei nükjidong tongtetsü atema meranga inyaksü ajungshi. Meru-isa kaketshirtem dang pei shi temang anepalutsü koda tongtibang iba indang angazüksü ayongzük. Lanur aser lenmang tai nung ajemoktsü temela asünung pai parnok dang tarutsü tajungba ka atema tesebpa chiyongtsü achiba nungi pilaa alitsü aser

yimya yimpong tamajung mebenshitsu ajungshi. Maneni St. Paul School, Noklak aser Government Higher Secondary School, Noklak nungi ketdangsurtemi tajungshi o jembiba. Sentong nung district nungi takok angurtem nem tetushi agütsü. Iba sentong ya Heme Lam lenisüba nung agi aser EAC Noklak Kathyinla-i tepela anküp o jembiba liasü.

13buba Music Awards of Nagaland sentong Oct 16 nü agitsü

Dimapur, Mongputeni/October 13 (TYO): 13buba Music Awards of Nagaland 2021 tetushi agütsüba sentong October 16 nü RCEMPA, Jotsoma nung nikongtsüsü 5:00 ako nungi tenzüka agitsü. Iba tetushi agüba sentong nung Atso Chasie, Colored Keys, Kekhrrie Ringa, Keneisenuo Sorhie, Mengu Suokhrrie aser Thejangunuo nungeri shilem agitsü. Tetushi ya category 18

atema agütsüsü, kong Lifetime Achievement atema category tasen ka bendenlokogo. Iba sentong lenirji Zuchobeni Tungoe, Femina Miss India Nagaland 2020 asütsü aser Temjen Imna Along, Hon'ble Minister, Higher & Technical Education, Tribal Affairs Nagaland alakteta jaoker asütsü. Tetendangertem rongnung Actor, film director, producer, music director, composer aser taoba mapang VJ Luke Kenny,

atema agütsüsü, kong Lifetime Achievement atema category tasen ka bendenlokogo. Iba sentong lenirji Zuchobeni Tungoe, Femina Miss India Nagaland 2020 asütsü aser Temjen Imna Along, Hon'ble Minister, Higher & Technical Education, Tribal Affairs Nagaland alakteta jaoker asütsü. Tetendangertem rongnung Actor, film director, producer, music director, composer aser taoba mapang VJ Luke Kenny, kentener Alobo Naga, pianist, entrepreneur aser music educator Bethel Tsuzu nunger densema lir. Maneni best music video tetendangertem ji proprietor, Find Studioz Production & Advisory Panel Member, Censor Board, Mumbai Rebecca Changkija Sema aser Bollywood Film writer & Director Jutikaa Mahanta, Media & Marketing Expert Shiraz Henry na asütsü.

LRD aser local entrepreneur na longjem

Dimapur, Mongputeni/October 13 (TYO): Hoyang restaurant cum coffee house/bar, October 12 nü Mon nung MLA, N. Thongwang Konyak-i lapoktsüogo Thongwang-i, Mon nung aliba lanurtem dang lensayuba atema Land Resources Department dang kanga pelaba metetdaksü. Paisa, LRD aser local entrepreneur na longjem project takok ngua tembangba sülen Mon nung mezüngbuba coffee bar ka densema restaurant ka lapokogo, ta ashi. Pai, nüburtem dang ajak ajangzüksü atema aser talisa raliwalirtem ajangzüksü atema restaurant inyakyim akhümsüba amshitsu ajungshi. Sentong nungsa Deputy Commissioner Mon,

Thavaseelan K, IAS-i, Land Resources Department inyakyim ajanga aluyimertem dang masü saka entrepreneurs tem inyaksangshitsu atema lenmang sadema lapoktsüdar aser iba ajanga state nung coffee shishilembaba tali akümer ta ashi. Pai, Department dang district kübok tanga tesemtem nunga kasa maparen ya benoka inyaksü mepeshi. Kasa mapang nung DPO, Land Resources, Mon, Biren Chetri-i ashiba agi, "Azadi Ka Amrit Mahotsav" nung shilem ka ama Department-i local entrepreneur, Lizhu Jorlin nem Mon nung coffee house/bar ka lapoktsü atema coffee yangluba machine ka agüja teyari agütsü aser kasa mapang nung Barista,

Kohima nung pa nem hopta ka training agüja liasü. Paisa, District nung 2016-17 küm nungi coffee tsünü tenzüker aser upper Mon len tesem aika nung coffee kanga takok ngua tsünüdar aser 2021 küm dried capsule seret 2000 shi adokdaksüogo, ta ashi. Chetri-isa, Department-i Noble Cause Coffee Company, Capetown, South Africa den küm 30 atema tenangzüktepba ka yangluogo. Iba company dang yagi Nagaland nung yangluba coffee yoktsü, ta metetdaksü. Maneni pai, coffee lu ayimba ajungkettsü atema Coffee Board of India aser Land Resources Department, Government of Nagaland den longjem aluyimertem nem technically tsütsü teyari agütsüsü, ta ashi.

OFFICE OF THE
MERANGKONG YADEN UNGER KIDONG TELONGJEM
P.O. Tuli Town - 798618
Dist.Mokokchung, Nagaland
TENÜNGSANG ASER TETUSHI AGÜTSÜR

Wb. Imtisüsü Yaden aser Wt. Narola dena jabaso Sp. **Moalong Yaden-i** World Body Building and Physique Sports Championship at Tashkent nung 5th buba jenjang tashi tongteta Naga kin asoshi takok konang aser tenüngsang bener arutsüba asoshi Merangkong Yaden Unger Kidong Telongjem-i tenüngsang aser tetushi agütsür.
Tsüngremi tarutsü nunga jabaso jenjang tajung aser takokba nung moaja aniang ta kidongi sarasadema atar.

Sd/- Wb. T. Manen Yaden President
Sd/- Wb. Akümnüngsang Yaden G/Secretary
Merangkong Yaden Unger Kidong Telongjem

Asst Professors mapa atema Ph. D degree maneni nungdaksü

Dimapur, Mongputeni/October 13 (TYO): D degree ya mandatory qualification ka asütsü ta shia lir. University Grants Commission-i 01.07.2023 tashi University tem kübok Department Assistant Professors shimtsü atema PhD. Ya mandatory requirement kümdaksüogo. University Grants Commission (UGC) (Minimum Qualifications for Appointment of Teachers and other Academic Staff in Universities and Colleges and other Measures for the Maintenance of Standards in Higher Education) Regulations, 2018 ajanga, 01.07.2021 nü nungi Assistant Professors mapa atema Ph. D. Degree ya mandatory qualification ka asütsü," ta shia lir.

D degree ya mandatory qualification ka asütsü ta shia lir. UGC Secretary Prof. Ranjish Jain-i, October 12 nü sangdong ka ajanga, COVID-19 wara pokteter aliba ajanga Assistant Professors mapa atema Ph. D. ya mandatory qualification ka kümtsür aliba ya 01.07.2021 nungi 01.07.2023 benoka atatsü, ta metetdaksü. October 12 nü ketdangsurtemi sangdongba Gazette of India extraordinary Part III- Section 4 nung "University tem nung Department balala atema Assistant Professor shimtsü asoshi Ph. D. Degree ya 01.07.2023 tashi mandatory qualification ka asütsü," ta shia lir.

Phek DPDB-i topper tem nem tetushi agütsü



Dimapur, Mongputeni/October 13 (TYO): Phek District Planning & Development Board senden den repsema HLSS /HSSL topplers tem nem tetushi agütsüba sentong ka October 11 nü agiogo. Iba sentong ya Deputy Commissioner & vice chairman, DPDB Phek, Razouvolie Dozo lenisüba nung DC conference hall nung agia liasü. Sentong nung Dozo-i topper tem nem tenüngsang agütsü aser alima den tokteptsü atema parnok dak keta aliba tajungtiba agütsüsü ayongzük. Accurate secure marks tem ya Leche-u Kapfo, Akuku Venuh aser Tsesheveyi-u Doulo nungeri

ngutet aser subject toppers tetushi Nusakulu Tetseo, Thujovalu Keyho aser Wewu-u Kapfo nunger nem agütsü. Parnok ajaka nem senpet aser kuli kaket agütsüogo. Kasa mapang nung District Education Officer, Phek-i, DC aser züngsemtemi teka amteper inyakba atema kanga pelaba lemsatop. Ajak nem angati agi education agütsüsüba dak sendakba nung pai, tanur ajak nem education agütsüsü atema lokti nung nüburtem ajak nem osang agütsüsü nungdaka lir, ta ashi. Senden nungsa Board züngsem tasentem metetpelaba den parnok pelashishia agizüka liasü.



Kohima October 13: Swarnim Vijay Varsh 'Victory Flame' October 13 nü Zakhama Military Station tonga aruogo, koba Station Commander-i agizüka liasü. 1971 War aser "Op Vijay", 1999 nung raratem densema ex-servicemen tem aika iba sentong nung dena liasü. Sentong nung ex-servicemen tem nem tetushi agütsü aser linük sobaliba sayutsü atema sobaliba saya sentong ka ayongzüka agi. Sentong tembangba sülen 'Victory Flame' ya Imphal-i bener ao.

NSF Trophy: Billy Graham, Bandits & Asiifii nungeri takok angu



Kohima, Mongputeni/October 13 (TYO): 21buba NSF Martyrs' Memorial tournament tanü asaya nung Billy Graham Football Club, Bandits FC Kohima aser Asiifii Christian Institute Manipur-i takok nguogo. Iba asayamung ya Indira Gandhi Stadium, Kohima nung tang tasayadak lir.

Mezüngbuba asaya nung Billy Graham FC-i goal ka agi Seiyhazou Hill Boys tsükdakja liasü. Asaya nung goal ka ya Mhasilietuo Yhome-i idakja liasü.

Tanabuba asaya Bandits FC Kohima aser Wokha Town

Club na asaya. Iba asaya ya telok anapronglai goal anana agütsür tembangba sülen tie break nung goal 4-3 agi Bandits FC Kohima-i asaya akok.

Asaya nung Khati Kath aser Seyievituo Mere nati Bandits FC atema goal kaka idaktsü aser Hatsabemo Ezung-i Wokha Town Club atema goal ana idakja liasü.

Tanü tatembangbuba asaya nung Asiifii Christian Institute Manipur-i tie-breaker ajanga Jakhama Youth Organisation goal 5-3 agi koka liasü. Telok anapronglai goal kaka idaktsür

asaya tembangba sülen tie-breaker asaya.

Atakzüksür aliba asaya mapang Asiifii Christian Institute atema Adani Atheziio-i goal ka aser Jakhama YO atema Mezizoto Tetso-i goal ka idaktsü.

October 14 nü asaya yamai alitsü:

1. Head Hunters vs Phezou SC Tsiesema @ 11.30 AM
2. United Brothers FC vs United Falcon Medziphema @ 1PM
3. Mele FC vs Highlander's FC @ 2.30 PM

Dhoni mentor mapa atema taa magitsü: Ganguly

Mongputeni/October 13, 2021 (Agencies): Taoba India team captain Mahendra Singh Dhoni-i, iba ita UAE aser Oman nung T20 World Cup asayaba mapang Indian cricket team mentor mapa inyakba atema taa magitsü, ta BCCI tir Sourav Ganguly-i PTI dang ashi.

Nüngtugu taoba India team captain ya taoba ita BCCI-i WC atema asayartem sangdongba mapang mentor ka ama team nung aniokogo. Iba asayamung ya October 17 nü tenzüksü.

"India team mentor asüba atema Dhoni-i taa kecha magitsü," ta Ganguly-i ashi.

BCCI secretary Jay Shah-ia Mongolbarnü ashiba agi, T20 World Cup nung mentor ka ama Indian team nung shilem agiba atema MS Dhoni-i taa kecha magitsü.

"T20 World Cup atema India

team mentor ama shilem agiba atema MS Dhoni-i taa kecha magitsü," ta BCCI Secretary Jay Shah-i ANI dang ashi.

Dhoni lenisüba nung Chennai Super Kings-i IPL asem kokogo aser pa lenisüba nunnga India team-i World T20, Champions Trophy aser World Cup kokogo.

Jay Shah-i, arishi küm 40 tain international cricket asaya nungi anener alisang aser linük nung white-ball cricket asayartem rongnung nungtugtiba asayar ya team nung anisemtsü atema pai Dhoni den Dubai nung ajurutepba sülen telemtetba agi ta ashi.

"T20 World Cup kija atema Team India Mentor asütsü atema ni telemtetba agiba pai mulunga agizükogo. MS Dhoni-i BCCI-i pa nem agütsüba maongka agizükba atema

kanga pelar aser national team nem teyari agütsütsü atema pa tejangraba lir. MS-i coach Ravi Shastri aser tanga support staff tem den longjemer team India nongita yaritsü," ta Shah-i ashi.

Pa anisemtsü atema Kohli aser Shastri na den sensak asem masem ta asüngdangba mapang Shah-i, "ni captain aser vice-captain aser Ravi Shastri den sensaksemogo. Parnokia mulunga agizükogo aser ibayongji ken o tatembang ka dangi aruogo," ta ashi.

T20 World Cup ya UAE aser Oman kübok Muscat, Dubai, Abu Dhabi, aser Sharjah nung asayatsü.

Asayamung ya October 17 nü qualifying round asayaa tenzüksü. India team T20 World Cup nung mezüngbuba asaya October 24 nü Pakistan den asayatsü lir.

India team Thomas Cup quarterfinals-i iogo

Mongputeni/October 13, 2021 (Agencies): Tang asayaa aliba Thomas Cup nung India tebur badminton team-i Group C nung 5-0 agi Tahiti koka quarterfinals-i iogo. 2010 küm sülen tang mezüngbuba India team-i quarterfinal tongtetogo.

Deobarnü mezüngbuba asaya nunga India team-i 5-0 agi Netherlands team koka liasü.

Mongolbarnü Tahiti akokba sülen Group C nung India team top-two nung group asaya tembangtsü jangaogo aser parnok quarter-i aitsü.

Bodhbarnü India team Group C nung tatembangbuba asaya China den asayatsü.

Mongolbarnü asaya nung mezüngbuba B Sai Praneeth 21-5 21-6 agi Louis Beaubois minute 23 nungdang koka liasü.

Kija asaya nunnga Sameer Verma-i minute 41 nü Remi Rossi 21-12 21-12 agi koka India team 2-0 agi tejangdang aküm.

Maneni kija asaya tasembuba nung Kiran George-i 21-4 21-2 Elias Maublanc madak takok ngua India team-i asaya kokatok.

Kasa mapang nung Krishna

Prasad aser Vishnu Vardhan nati tena tata asaya 21-8 21-7 agi akok.

Tarep asaya tatembangbuba nung Satwiksairaj Rankireddy aser Chirag Shetty nati Maublanc aser Heiva Yvonet na 21-5 21-3 agi koka liasü.

2010 küm sülen India tebur team tang mezüngbuba iba asaya nung quarterfinals tongtetogo. 2010 küm quarterfinals nung parnok Indonesia-i tsükdakja liasü.

India tetsür team-ia Mongolbarnü 3-1 agi Scotland madak takok ngua Uber Cup quarterfinals tongtetogo.

Catch Them Young Tournament ayonger

Dimapur, Mongputeni/October 13 (TYO): District Sports Officer, Zhopivi Zecho-i sangdong ka ajanga, 13buba Kohima District Catch Them Young Tournament (U-14) 2021 October 29 aser 30 nü I.G Stadium & T.T Stadium, Kohima nung asayatsü ta tejangrartem ajak nem metetdaktsüogo.

Asavatem yamai alitsü:

1. Table Tennis
 - i) kija asaya - tetsür aser tebur
 - ii) tarep asaya - tetsür aser tebur
2. Badminton
 - i) kija asaya - tetsür aser

- tebur
 - ii) tarep asaya - tetsür aser tebur
 3. Athletics
 - i) 100m - tetsür aser tebur
 - ii) Long Jump - tetsür aser tebur
 - iii) High Jump - tetsür aser tebur
 - iv) Shot put - tetsür aser tebur
 - v) 800m - tetsür aser tebur
- Asayamung nung shilem agitsü janngartemi District Sports Office Kohima & T.T Stadium Kohima nungi office mapang form agizükttetsü, ta kasa sangdong ajanga metetdaktsüogo.

Akuluto nung volleyball asayamung tenzükogo

Dimapur, Mongputeni/October 13 (TYO): 43buba Zunheboto District Open Volleyball Running Trophy October 13 nü BPC ground, Akuluto nung tenzükogo. Iba asayamung ya Black Panthers Club Akuluto-i ayongzük aser asayamung lapokba sentong nung Deputy Commissioner Zunheboto, Peter Lichamo alakteta jaoker liasü.

Lichamo-i, asayamung nung shilem agirtem dang taküm libaliro ajak nung

yimayimpong tapet benshitsü ayongzük, koba saisapong nung ajak dang tongtibangtiba lir, ta ashi. Asaya ajanga shitemang aser tekelok shisatsü ajak anema toktsür, ta paisa ashi. DC-isa, mapang talangka iba asayamung ayongzük asayayonga aruba atema asayamung ayongertem nem tenüngsang agüja liasü.

Taküm iba asayamung nung ajak senteper team 16-i shilem agidar, koba October 15 nü tembangtsü.

Ronaldo-i mezüngbuba hat-trick 10 idaktsüogo

Almancil, Mongputeni/October 13 (Agencies): Cristiano Ronaldo ya tebur asayartem rongnung international football nung hat-trick 10 idaktsüba mezüngbuba asayar kümogo. Portugal nung striker yagi iba alizüng ya 2022 World Cup atema Group A qualifying asaya ka nung Portugal aser Luxembourg na asayaba mapang tongteta liasü.

Luxembourg goal 5-0 agi akokba asaya nung Ronaldo-i penalty ana idaktsü aser iba sülen asaya tatemite tekola agi goal ka idakja liasü. Pa tang tashi nung Portugal atema hat-trick 10 densema pa indang career nung hat-tricks 58 idaktsür lir, ta Goal.com sangdong ka ajanga metetdaktsü.

Algarve Stadium nung Portugal team-i kanga kara asaya tenzüker aser minute 17buba nungbo parnok goal 3-0 agi tejangdang liasü. Cristiano Ronaldo-i minute 8buba nung penalty ka ajanga mezüngbuba goal idaktsü.

Iba sülen mapang tatsüka dang lir Ronaldo-isa penalty ajanga tanabuba goal idaktsü. Maneni mapang tatsüka tsüngda nung ano Portugal team atema Bruno Fernandes-i goal tasembuba idakja liasü. Iba goal densema Fernandes-i national team atema goal trok idaktsüogo.

Asaya tanabuba shilem nung asaya meyilongi aküm aser Portugal-i asaya azüoka asaya aser goal idaktsütsü atema maongka ishika angu.

Portugal team-i maneni kanga junga asaya aser minute 69buba nung Bruno Fernandes-i metsüba corner ka Joao Palhinha-i idaktsü aser asaya tatemtsü lia Ruben Neves-i agütsüba ball ka Cristiano Ronaldo-i kanga junga tongokja parnoki asaya akok.

Group A nunnga Mongolbarnü Serbia-i goal 3-1 agi Azerbaijan kokogo. Group A nung Serbia temaba jenjang nung lir aser parnok Portugal dang nungi point ka agi timba lir.

BILEM DANGANG

"Karibo timtem mekokmim jenti liaka ajak den pelaa litetter."